

Matiz Oriental di Virginia Calvino

ORANJESTAD - Dia promé di Februari awor lo tuma lugá un exposicion di pintura titulá: "Matiz Oriental", di Sra. Virginia A. Calvino.

Sra. Calvino a bin ta asociá su mes cu e arte aki den diferente aspecto for di tempo di su infancia. Tambe Sra. Calvino a haña algun estudio di e artista Frances Fabricius y Bourdett pa mas di seis aña, y a desarroyá esaki riba un extremo cu un técnica hopi difícil cu pastel riba canvas.

Alavez e pintora aki ta hopi bon cu verf di azeta, acrylic, watercolor, charcoal y potlood.

Durante un entrevista cu Bon Dia Aruba a sostené cu Sra. Virginia Calvino el a bisa su secreto kico e ta haci promé cu e cuminzá pinta.

Semper promé cu e cuminzá e ta meditá como 10 pa 15 minuut. Despues e ta bisa e siguiente frasenan: "e mannan aki cu ta bai pinta e cuadro aki no ta di mi, pero ta mannan di bo cu bo ta bai giua y pinta algo bunita pa cuakier persona cu ta gusta e cuadro aki". Y despues e ta cuminzá pinta.

Nunca el a dañá un pintura, den diez aña di su carera como pintora, si el a yega di dañá dos papel ta hopi pasobra si acaso e pintura cu e kier a pinta bira algo diferente semper e ta keda único y bunita.

Hopi biaha Virginia tin su ideanan propio pa pinta algo, p.e. un flor específico, un Magnolia. E ta cuminzá na pinta e flor cu ta un idea di dje, pero manera cu e caba di bisa e palabranan cu e sa bisa, mesora e flor cu e kier a pinta ta bira algo otro cu hopi biaha ta resultá mas bunita mes cu e idea cu Virginia mes ta tin.

E arte di pintura pa Virginia ta lagué sinti renová, manera un renovacion den su bida. Virginia ta un persona cu ta pensa hopi y ta meditá hopi tambe. Sra. Calvino ta haña cu un pintor semper mester haci su trabao cu amor y expresé riba e pintura loke un persona ta sinti. Pa Virginia cada bez cu e pinta e ta haci e trabao aki cu hopi amor y cariño y e deseo di por pone un persona sinti su mes contento.

Pa conocé Sra. Virginia Calvino un poco mas, fuera di pinta e ta haci hopi trabao voluntario y gusta traha cu mucha y hende grandi. Hopi atencion tambe e ta pone na personanan cu tin problema cu oído y tambe personanan handicapped.

Virginia a nace na Panama pero pa hopi aña el a biba na Texas, Merca.

Fuera di a haci trabaoan voluntario den varios organizacionnan na Texas, aki na Aruba tampoco e ta sinta keto.

Algun di su trabaoan cu e ta haci voluntariamente ta na FEPO, durante e temporada di Sinterklaas el a yuda hopi na Imelda Hof.

Pa loke ta e kaft di e buki 'Mi Bida y Aids' di e autor Arubiano Ruben Odor el a yuda den ilustracion di e buki aki.

E tabata tambe un di e huradonan durante e concurso di pintamento di poster cu tabatin di Woman's Club en coneccion cu Dia International di Aids.

Actualmente e ta yudando algun mucha sordo di Aruba, esta di siñanan e trabao di handenarbeid di cual nan ta gusta masha hopi.

Conque fuera di ta un persona cu ta haci hopi trabao voluntario y yuda otro, Virginia ta pensa cu un persona cu realmente ta stima arte di berdad, ora e ta bai pinta, no ta hiba e pensamiento cu ta bai pinta un cuadro pa vende. P'e e pensamiento aki hamas ta bin dilanti. Pesey hopi biaha ora e pinta su cuadronan mayoria biaha e ta keda cu nan pasobra nunca el a hiba e pensamiento ey.

Pero si tin un hende cu ta gusta un di nan y ta deseá di cumpré anto ta algo otro.

Pa e exposicion cu Sra. Virginia Calvino lo tene promé di Februari awor tin 25 cuadro oriental cu lo ser exhibí den Biblioteca Nacional na San Nicolas.

Pa finalizá Virginia a bisa algo hopi importante; "un pintor nunca por hiba un pensamiento di un comerciante pasobra p'e e persona ey no ta un pintor".

Pesey tin un dicho cu ta bisa: "Por amor al arte".



Riba e foto ariba Sra. Virginia Calvino sintá hunto cu algun cuadro cu lo ser exhibí den Biblioteca Nacional na San Nicolas. Y abao Virginia ta haciendo un trabao único cu acrylic riba algo special cu yama Tree Bark. E último aki ta un material special orginiá di un palo cu ta bin di Mexico.

